

## IZVOD IZ ZAKONA O TURIZMU\*

(“Službene novine KS”, br. 19/16, 31/17, 34/17 - ispravka i 13/21)

### Član 63.

#### (Članovi Turističke zajednice)

(1) Turistička zajednica ima obavezne članove, predstavnike privatnog i javnog sektora turizma iz općina sa područja Kantona.

(2) Obavezni članovi Turističke zajednice su sva pravna i fizička lica, koje na području Kantona imaju sjedište ili bilo kakav organizacioni dio i koje ostvaruju prihod pružanjem ugostiteljskih ili drugih turističkih usluga ili obavljaju s turizmom neposredno povezane djelatnosti.

(3) Djelatnosti iz stava (2) ovog člana utvrđuje ministar pravilnikom, u skladu sa Klasifikacijom djelatnosti Bosne i Hercegovine.

(4) Obavezno članstvo u Turističkoj zajednici počinje danom osnivanja Turističke zajednice ili danom početka obavljanja djelatnosti pravnog i fizičkog lica na području Kantona.

(5) Na prestanak obaveznog članstva u Turističkoj zajednici ne utiče privremena obustava djelatnosti kao ni sezonsko obavljanje djelatnosti.

(6) Obavezno članstvo u Turističkoj zajednici prestaje: prestankom rada Turističke zajednice, prestankom pravnog lica ili smrću fizičkog lica te djelimičnim ili potpunim gubitkom poslovne sposobnosti fizičkog lica, prestankom poslovne jedinice, promjenom sjedišta, prestankom ostvarivanja prihoda pružanjem ugostiteljskih ili drugih turističkih usluga ili obavljanjem s turizmom neposredno povezanih djelatnosti.

(7) Obavezni članovi Turističke zajednice, odnosno njihovi predstavnici, mogu birati i biti birani u organe Turističke zajednice.

(8) Osim članova iz stava (1) ovoga člana, Turistička zajednica može imati i dobrovoljne članove. Dobrovoljni članovi imaju ista prava i obaveze kao i obavezni članovi. **O zahtjevu za dobrovoljno članstvo odlučuje Skupština Turističke zajednice (izmjena 31/17).**

(9) Skupština Turističke zajednice, na prijedlog turističkog vijeća, može lica posebno zaslužna za razvoj i promociju turizma imenovati počasnim članovima Turističke zajednice.

(10) Počasni članovi Turističke zajednice ne mogu birati niti biti birani u organe Turističke zajednice.

### Član 82 a.

#### (Članarina)

Članarinu Turističkoj zajednici dužni su plaćati obavezni i dobrovoljni članovi Turističke zajednice iz člana 63. stav (2) i (8) ovog zakona (izmjena 31/17).

### Član 82 b.

#### (Visina članarine)

(1) Visina članarine koju plaćaju članovi Turističke zajednice zavisi od pravnog statusa obveznika (fizičko ili pravno lice).

(2) Zavisno od pravnog statusa obveznici plaćanja plaćaju članarinu po sljedećim procentima:

Pravno lice..... 0,05%

Fizičko lice..... 0,025% (izmjena 31/17).

(3) Članarina iz stava (2) ovog člana plaća se umanjena za 50% za kalendarsku 2021. godinu.

(4) Ministar će najkasnije u roku od deset dana od dana stupanja na snagu ovog zakona pravilnikom iz člana 63. stav (3) Zakona utvrditi djelatnosti na koje se primjenjuje stav (3) ovog člana (izmjena 13/21).

### Član 82 c.

#### (Osnovica za obračun članarine)

(1) Osnovica za obračun članarine pravnom licu je ukupan prihod ostvaren u djelatnostima utvrđenim u smislu člana 63. stav (3) ovog zakona. Ukupan prihod u smislu ovog zakona, čine svi prihodi koje

\* Zakon je objavljen u "Službenim novinama KS", broj 19/16 od 12. maja 2016. godine, a stupio je na snagu 20. maja 2016. godine. Izmjene i dopune Zakona su objavljene u "Službenim novinama KS", broj 31/17 od 10. avgusta 2017. godine, stupile su na snagu 18. avgusta 2017. godine i 13/21 od 1. aprila 2021. godine, a stupile su na snagu 9. aprila 2021. godine. Ispravka Zakona je objavljena u "Službenim novinama KS", broj 34/17 od 31. avgusta 2017. godine. Radi lakšeg prepoznavanja šta je u izmjenama i dopunama Zakona promijenjeno, tekst izmjena i dopuna odštampan je masnim slovima u svim izmijenjenim članovima.

je pravno lice dužno iskazati u računu dobiti i gubitka u skladu sa propisima o računovodstvu.

(2) Osnovica iz stava (1) ovog člana utvrđuje se pojedinačno za svaku poslovnu jedinicu, odnosno organizacioni dio izvan sjedišta pravnog lica.

(3) Prilikom obračuna članarine osnovica iz stava (1) ovog člana utvrđuje se tako da se ukupan prihod pravnog lica umanjuje za ukupan prihod ostvaren u poslovnim jedinicama.

(4) Osnovica za obračun članarine fizičkog lica je ukupan prihod ostvaren u djelatnostima utvđenim u smislu člana 63. stav (3) ovog zakona (*izmjena 31/17*).

#### Član 82 d.

##### (Način plaćanja članarine)

(1) Pravna i fizička lica članarinu plaćaju Turističkoj zajednici.

(2) Pravna i fizička lica uplaćuju akontaciju članarine do 15.-og u mjesecu za prethodni mjesec na depozitni račun Kantona Sarajevo. Obaveznik čiji godišnji iznos članarine prelazi 300 KM u odnosu na visinu obračunate članarine iz prethodne godine, akontaciju plaćaju mjesečno, a obaveznik koji plaća godišnju članarinu manju od 300 KM dužan je članarinu uplaćivati tromjesečno.

(3) Sredstva od članarine iz stava (2) ovog člana koja su uplaćena na depozitni račun Kantona Sarajevo raspoređuju se na račun Turističke zajednice.

(4) Uz dokaz o uplati članarine obveznici su dužni Turističkoj zajednici dostaviti i obrazac obračuna članarine iz kojeg je jasno vidljivo u kojoj općini obaveznik ima sjedište/prebivalište, odnosno u kojoj mu je izdato odobrenje za obavljanje djelatnosti.

(5) Izgled i sadržaj Obrasca iz stava (4) ovog člana propisat će ministar (*izmjena 31/17 i ispravka 34/17*).